

Arubá**A**ntaño

Loods y cu varios cambio oficina di Tursimo



E edificio aki for di e tempo di nos Aruba Antaño ta testigo di hopi cos tanto histórico como di recuerdos pa loke ta trata nos dushi isla di Aruba awendia nos pais. Primeramente pa loke ainda nos por corda e tabata nos sitio di loods, y cu basta e ta corda nos di e personanan cu tabata encarga cu e funcion di trece y saca barco nan cu mara na nos waf di rey awendia yama Bali Pier. For di aki nan hopi di nos hendenan a barca bordo di Gracia Maria pa bai Cuba corta caña, ya cu e trabao no tabata duna y no tabatin trabao tampoco. Un tempo di apenas un par di mil habitantes cu tabatin. Aki nos ta corda riba Miguel Odor, y oironan tal manera e papa di nos amigo Ulpiano Amaya. Un otro atraccion y diversion di nos hendenan tabata riba Añ'i La Reina (31 di Augustus - Nos Reina Stima Wilhelmina) Un vuurwerp mucho mas atractivo di loke nos ta mira awendia riba e celebracion di Añ'i La Reina. Esaki tabata tuma lugar net pariba di e edificio mencioná. Otro cos cu e edificio aki a testiguá tabata e soldánan di 4.20 cu tabata correwarda pariba di dje, y cu si mester caba dilanti di e waf lo yega na saca masha hopi bleki di paté de foi, ya cu e schutterman tabata hartá di come esaki cu jam tur dia. Hunto cu e waf di rey por a aprecia e competencia di landamento y di pustamento di boto cu e tempo ey tabatin bastante den Paardenbaai pa bai pisca rond di nos isla of na west. Pero awendia basta parece segun publicacionnan nos piscadórnan tin mester di permiso pa bai subi lamar pa nan unico ofishi cual ta di piscador. Algo poco strano pa comprende, pasobra laman ta publico y e awa territorial ta pertenece na nos piscadórnan. Den e botonan cu e edificio aki a mira den nan pustamento nos ta corda ainda Mi Consuelo, Burdugu, Vlinder di Bonaire. Celebracion sano di e tempo di Aruba Antaño. Mescos nos por bisa di nos playanan (beachnan) cu no por ta di ningun hotel, ya cu esaki tambe ta algo publico, nomás den pasado a yega di ser cometi un error di a concede e beach dilanti Bastrati e tempo ey como nan propiedad. Pasobra si ta asina anto un biaba mas nos tin di constata cu "nunca bo ta rey riba mes suelo" y esaki hasta por sirbi pa loke ta trabao tambe, ya nos ta mira stranberonan ta yenando cu trabao, y ta manera Pierre Lauffer cu den paz aescanse a menciona den un di su poëmanan "warawara di otro parti ta bin chica nos poz". Un biaba mas nos tin di recorda cu edificio nan manera esaki y esnan cu a ser derrumba pa moderniza nos ciudad y otro partinan, ta nos momumentonan cu ta representa parti di Aruba Antaño y di e historia di nos dushi suelo.